

KUIS kutip zakat RM1.5juta, agih bantu mahasiswa asnaf

September 7, 2017

OLEH HAFIZAN TAIB

BANDAR SERI PUTRA, 7 SEPT: Kolej Universiti Islam Antarabangsa Selangor (KUIS) berjaya mengumpul RM1.5 juta dalam kempen Jom Berzakat dalam membantu mahasiswa mengikuti pengajian di kolej berkenaan.

Timbalan Rektor Pengurusan Korporatnya, Dr Zulkifli Abd Hamid, berkata kutipan dijalankan sejak 2014 mendapat sambutan menggalakkan daripada masyarakat prihatin.

“Bermula 2014, Majlis Agama Islam Selangor (MAIS) memberi kebenaran kepada KUIS mengutip zakat dan setakat ini kutipan dibuat sentiasa meningkat dengan pada awal penubuhan, kita berjaya mengutip hampir RM400,000.

“Memasuki tahun ketiga iaitu setakat September tahun ini, kita berjaya mengutip kira-kira RM1.5 juta,” katanya kepada SelangorKini.

Beliau berkata, 50 peratus daripada hasil kutipan akan diagih KUIS kepada golongan asnaf yang berhak khususnya pelajar kolej sendiri.

KUIS dilantik sebagai agen Lembaga Zakat Selangor (LZS) dengan 50 peratus daripada kutipan zakat diagihkan kepada mahasiswa manakala selebihnya kepada agensi berkenaan.